

E anochi aki e resultado di e eleccion pa Reina di Carnaval, Joker y Yoyita lo worde anunciá.

E activo club Juventud Cristian tampoco ta keda atras, y Diasabra awor durante un baile di Carnaval na Hotel Strand, nan lo anuncia e resultado final di eleccion di e Reina di Carnaval di nan Club.

Trappers Club di Santa Cruz tambe ta celebrando Carnaval, y riba 17 di Februari venidero nan lo continuá cu nan fiesta Carnavalesco, anunciando e mesun anochi aki e resultado di nan eleccion pa Reina.

Coronacion di e Reina di Trappers, kende tambe lo tuma parti na e eleccion di Reina di Carnaval di Aruba, lo tuma lugar dia 24 di e luna aki.

Cu e animo y entusiasmo pa Carnaval riba nos isla ta aumentando dia pa dia mas y mas, ta worde comproba cu e hecho di cu e comerciante nan e biaha aki, a contribui royaal y espontaneamente, locual a duna e comité e facilidad di por a realiza nan plannan grandi cu entre otro tabata e regalo di un auto pa e candidata cu worde eligi como Reina di Carnaval na Aruba.

Tambe nos a worde informa, cu pa e grupo, flota y individual, e comité tin disponible premionan cash di hopi balor, por ehempel pa e float of the year, y e group of the year, nada menos cu 250 cada uno.

Pa e Prins y Pancho, cu den pasado practicamente no tabata haya nada, e aña aki e Carnaval Comité a pone como regalo dos pasashi ida y vuelta pa Puerto Rico.

Pa Carnaval di Mucha, tambe e Comité di Damas lo percura pa mehor treat y premionan di mucho mas balor cu antes.

E eleccion di Prins di Carnaval, cual a worde posponi pa un dia despues debí como cu no tabatin orquesta disponibel, lo tuma lugar awor na Commandeursbaai Club cu un gran fiesta y show bailable for di 10 'or di mainta te 10 'or di anochi.

Esaki ta e fiesta mas grandi organiza ariba nos isla como cu lo participa na e ocasion aki nada menos cu e ocho mehor orquestanan riba nos isla.

Fuera di e orquestanan Caribbean Ambassadors, Sonora del Caribe, Los Duques, Sensacion Musical, Estrella Musical, Nueva Sensacion, Los Elegantes, Conjunto Moderno y Los Principes, tambe lo duna nan cooperacion, Los Wois-Wois, U. S. Ohio, Cahanan di Orgel, Victoria, Blenchi Gloria, El Especial, Colebra Berde, Trio Los Madrigales, y varios otro artistanan local.

Esaki lo ta sin duda alguna e fiesta mas grandi organiza ariba nos isla.

FIESTANAN DI CARNAVAL RIBA NOS ISLA

Diasabra awor, 10 di Februari, Aruba Tivoli Club lo tene "Un Caravana Pan Americana", na unda tur e miembronan a worde invitá pa bai bisti como e Sur Americanonan, y lo tin hopi premios disponible.

Lo tin hopi atraccion y sorpresa.